



Aqqalu C. Jerimiassen

UPA 2020/43

Atassut

18/05-20

Pissutsit immikkut ittut inuiaqatigiinnut kalaallinut immikkut pingaarutillit (Covid-19 pissutsit) pillugit Naalakkersuisut Siulittaasuanit nassuiaat.

(Naalakkersuisut Siulittaasuat)

Naalakkersuisut siulittaasuat, erseqqissumik ingerlaannaq naqqiummik oqarfigissuakkit, inuiaqatigiimmi paasisariaqarmassuttaaq una. Naalakkersuisut iliuuseqartaqattaanngillat partiit siuttui peqatingalugit, aallaqqaataaniilliuna partiit siuttui iliuuseqarnissamut sukataaqisut Naalakkersuisut tamanna akimmiseqqanikuusimangaat.

Ulloq 04/03-20 Sermitsiaq.ag ammaraanni takuneqarsinnaavoq, Atassutip erseqqissumik Naalakkersuisooqatigiinnut uparuaataat, tassalu corona pillugu sumilluunniit sillimmartitaarummik ernumaqqusinnginnermillu nipaarsaaqqusiuarsimaneq pillugu naammangiliinermik killiffilimmik oqariartuut.

Qujanartumillu KIISAMI tamassuma kingorna Naalakkersuisut siulittaasuat inuiaqatigiinniik ersinngingaareerluni puttutinnguarpoq, partiillu siuttui ataatsimeeqatigiittarnerat angusassaq pitsaanerpaaq, nappaassuarlu qalipaateqanngimmat, sutigut isummersoqatigiissaaneq pillugu oqaloqatigiittarneq aallartippoq.

Maanna arlalitsigut ajoraluartumik “suleqatigiilluarsimaneq” ersigunnaalertorsimaqaaq, partiit siuttui tamarmiullutik suleqatigiinnerileraluarsimasaat ulloq manna tikillugu sulii neqitaalluarpoq Naalakkersuisut siulittaasuannit.

Tamassumunngalu eqqarsaatigalugu erseqqissaatigerusullugu, illuatungiliuttutut inissisimanermi sapinngisamik nappaassuup covid – 19-ip pileruttornerani pissuserissaarniarluta isumaqatigiissutit malillugit, ataasiinnarmik ataasiusumik avammut oqariartortartoqarnissaa eqqarsaatigalugu nipaqqaaartariaqarsimavugut, partii ataaseq eqqaassanngikkaanni, tupaallannartorsuunngilarli taanna.

Tamassumalli arlalitsigut kingunerilerpaa ajoraluartumik, partiini siuttuusugut pissuserissaarniarsarigaluarnitta, isumaqatigiissutip eqquutsinnissaanik kinguneqartitsiniaraluarnitta inuiaqatigiinnittaaq uparuartuilernermik kinguneqalernera, tassalu partiit nipaannerujussuat pissutsini ajornartoorfiusuni.

Qujanarnerpaarli tassaavoq, nunatsinni covid – 19-imik toqusoqanngilaq ulloq manna tikillugu, taannaavorlu partiit tamattaalluta suleqatigiinnitsigut naalakkersuisunut suliaritissinnaalersimasarput, killormuunngitsoq.



Ilaqutariinneq sukarsuuvoq pingaernerpaaq. Covid – 19 ajoraluaqisoq, mattussinerillu assigiinngitsut pingaluartut allarluinnarmik ersertitaqarportaaq tamanna. Tassalu ilaqutariinni eqqissiviilliornerit mattussingallarnermi ersarinneruleneri, tassuunakkut aammaarluni takussutissaqarluinnalerpoq SULI annertungaaqisumik nunatsinni suliaasaqartugut, nunatsinni ilaqutariit akorngini eqqissiviillioortoqartarnera pillugu annertuumik akiuiniarnissamut sammivilimmik suliniuteqaqqittariaqarluinnartugut.

Aningaasaqarnerup appariaateqarnera nunarsuaq tamaat tamarluinnavitsinnut equivoq. Tamannalu avaqunneqarsinnaanngivippoq, uagulli eqqarsaatigilluagaanerusumik pilersaarutissaqartariaqarpugut nunatsinni, minnerunngitsumillu uagut qinikkat qanoq namminertaaq uuma pisup nalaani pilliuteqaqataasinnaanerputtaaq eqqarsaatigisinnaasariaqarlugu, qanormi aamma namminersortortagut kisimik naalliussammata, inoqatigunuku. Piffissaq aaliangersimasoq pilliuteqaqataasinnaanerputugut qinikkatut sulisuusugut?

Inuusutissarsiornikkut takornariaqarnek eqqugaanerpaavoq, namminersortullu sakkortungaaqisumik eqqornerlunneqarput. Umiarsuit takornariartaatit, oqarluaannaraanni tamapajaamik taamaatipput. Eqqarsartariaatsimilli nutaanerumaamik peqarsinnaasariaqaraluarputugut taamaatiinnartinnikkaluarlutigit tamaasa, qanutut arlaannik iliuuseqarluta tikissinnaatittariaqaratsigit nunaqqatitsinnut aattuunneq pitinnikkaluarlugu. Sineriapput inoqarfikorpassuaqarpoq atorneqanngisaannartunik sunulluunniit, illukorpassuit oqaluttuarisaaneq allallu takusassaqqissut, tamakkuusinnaannginnerpat nunatsinni qimerluulaarsinnaasassaralugut nutaaliorusussutsumik eqqarsaateqalaarnitsigit takornarialerisortagut ingerlaannarsinnaaqqullugit?

Staycation, tassaavoq nunagisamiik aallannikkaluarluni illoqarfimmu allamut feriarnek, nunatta iluani aningaasaq sulitittariaqariaqarparput, nunatta avataanit takornariartussaangaluanut aningaasarpasuit annaasagut arlaatigut ilaminngui pilerseriassagutsigit timmisartumi issiaviit immertariaqarpagut, utertiinnarneqarsimasut angalatitseqatigiiffiit arlaannit.

Nunatta pingisaanit Air Greenlandimit aasaq manna billetsit akiisa affaannangortinneqarneratigut immaqa kujataarmiut avanersualiaasinnaangaluarput, avanersuarmiullu kujataanukaasinnaallutik, kitaamiut kangimukaassapput, kangianiillu kimmukaallutik. Qallunaatut afbudsrejse-nik taaneqartartut annaavissuinnarneqarnissaannik ilaminaarsuinik isertitaqalaarsinnaanissaq orniginarneroqaaq.

Aningaasatigut ajornartoornermi atorniartariaqarsinnaanermi oqariartorneq Atassummiit ataasiinnarmilluunniit akuersaarniannngilarput, sooq suli Kunngearfiup Danmarkip iluaniitilluta immitsinnut artukkorsorniarsarissuugut?

Naalagaaffeqatigiit akorngini mittarfinnut aningaasaleeqatigiinnissamik isumaqatigiissuteqartoqarsinnaappat, soorluttaaq ajornassanngitsoq aningaasanik ajornartoorfimmi ikioqatigiissinnaaneq, ingasammik maanna naalakkersuisuusut nunatsinni partii suleqataa siuttuutillugu soorlu ikioqatigiinnerunialaarsinnaassangaluartut.

Namineersinnaavungoortuinnarsinnaanngilagut timitaqanngitsumik, imminut tanngassimaartorsuuniarnitta ajoraluartumik aningaasaqarnerput siunissaq ungasinnerusoq



eqqarsaatigalugu pitsaanerulersikkunnanngilaa, taamaaliornittali kinguaatta siunissatsiannguat innarliinnarsinnaallugu.

Suli oqaaserpassuusinnaagaluarput, uanili piffissami illuatungiliuttuulluni partiaqqatut naalackersuisut siulittaasuanut oqaatsit apissikkusutat inissikkusutallu salliussasut Atassummiik pingaartinneruarput. Neriukkalarpugullu suli malinnaatitsineq kingumut ingerlanneqaleqqissinnaasoq nunarsuami nipaarsaallaqqinnerpaatut sulinerup kingumut uteqqittut peeqqinneratigut.